

TE HEHEURAA API.

I neia i te piha neneiraa a te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaiete, i te mau avae atoa. Te hoo, e piti farane i te matahiti hoê.

“Aore e faaroo ra e ore roa oia e mauruuru: o te haamori i te Atua ra, e faaroo e, e Atua, e tia'i, e o oia te faautua i te feia i imi papu ia'na ra.” Heb. 11: 6.

Nu. 9.

10 Tiunu, 1909.

Mat. 2.

Te Faaroo

Te haapii nei te Ekalesia a Iesu Mesia i te Feia Mo'a i te Mau Mahana Hopea Nei, o te faaroo nei o te parau matamua ia o te evanelia nei. Te na ô mai nei Iesu Mesia, “O te faaroo e ua baptizohia, e ora ia; area o te ore e faaroo ra, e faahapahia ia.” Mar. 16: 16. Mai te metua, aita oia e mauruuru ia ore ta'na tamarii ia tiaturi, e ia haapao ta'na parau, oia'toa te Atua aita oia e mauruuru i te taata o tei ore i faaroo ia'na ra. Heb. 11: 6. “O tei faaroo i te Tamaiti ra, e ora mure ore to'na; e o tei ore i faaroo i te Tamaiti ra, e ore oia e ite i te ora; te vai ra ia te riri o te Atua i nia iho ia'na.” Mai te metua taata nei o tei imi i te mau ravea'toa e maitai ai ta'na ra mau tamarii i te ao nei, oia'toa hoi to tatou Metua i te ao ra. No to'na aroha rahi, ua tonono mai oia i ta'na Tamaiti Fanau Tahi i roto i teie nei ao ei faaora i tei pohe, e e “imi tei moe ra ei faaora.” O te evanelia a Iesu Mesia te ravea a te Atua e ora'i te taata'toa nei, ia ore tatou i faaroo e ia haapao i te reira, ua roohia tatou i te pohe mure ore. Rom. 1: 16. Ia faaroo tatou i te evanelia e tia'i. Heb. 4: 2.

E ao to'na to tei tupu to'na ra faaroo i te evanelia e ua haapao i te reira, ua riro oia ei hoa here tauturu no te taata atoa. E faahanahanahia oia i te feia i farii i ta'na ra paran, e te feia i roaa to ratou maitai na roto i ta'na ra ohipa. Rom. 10: 5. E ia ore oia e roohia i te riri o te Tamaiti ia tae mai oia ra. "Ia fâ mai te Fatu ra o Iesu mai te ra'i mai, ma ta'na mau melahi mana atoa ra, ma te auahi ura ra, i te tuuraa mai i te pohe i te feia aore i ite i te Atua, e tei ore i faaroo i te evanelia o to tatou Fatu, o Iesu Mesia ra, mai te anaana o to'na ra mana."

E mana'o paruparu to te taata faaroo ore ia farerei oia i te ohipa rahi, aita oia e faaetaeta i to'na ra mana'o, e riro paha oia i te paran e, eita ia te reira e oti ia'n, e ua haaparuparu, e na imi i te otoheraa, e na reira te taata faaroo ore. Luk. 14: 18 20. E piti paeau to te mau ohipa'toa a te taata nei, oia hoi te paeau anaana e te paeau pouri. Te hi'o nei te taata faaroo ore i te paeau pouri e te peapea na mua, e no reira te rurutaina noa ra ratou, area râ e mea hape rahi te reira, no te mea te na ô maira te Fatu, "Eiaha e horuhoru to outou aau, e faaroo i te Atua e faaroo atoa mai hoi ia'u." No te faaroo paruparu o te mau aposetolo, aita e tia ia ratou ia tiavaru atu i te demoni na roto i te tamaiti lunati. Ua avau atura Iesu ia ratou no to ratou faaroo ore, ua faaite atura ia ratou, "Ahiri e faaroo to outou mai te hoê huero sinapi te rahi, e tia ia outou ia parau noa'tu i tera mou'a, 'A haere i ô atu,' e na'na e haere noa, e eita roa e mea e ore te tia ia outou." No te faaroo haraini o te mau aposetolo, a pohe ai Iesu Mesia, ua moe te paeau anaana a te Ekalesia a te Atua ia ratou; ua hi'o ana'e ratou i te paeau pouri. Ua mana'o ihora ratou ua mairi roa te ohipa a te Mesia, e ua fatata ratou i te ho'i atu i te chipa i mutaiiho ra, oia hoi ravaairaa i'a. I muri a'e ua fâ maira Iesu ia ratou, ei reira ua tupu faahou to ratou faaroo i te rahiraa, e ua faaitoito ma te tamau maite i te ohipa i roto i te mau ati e rave rahi.

No te faaroo paruparu o te tamaiti apî i parauhia'tu ai e Iesu ia horoa'tu i ta'na mau tao'a atoa na te vêvê. ua hi'o oia i te paeau pouri, e te mau ati o te taata tao'a ore, e ua moe ia'na te hanahana no te parahiraa maitai i roto i te basileia o te ao ra, e ua haere ê atura oia ma te oto rahi. Mat. 19: 21-23.

E mana'o papu to te taata faaroo, e te vai ra te maitai rahi i mua e i nia hoi, e e roaa ia te reira i te taata faaroo, e te vai ra te maitai rahi i nia, no reira e tiatono maite to'na mata i mua, mai te mau aposetolo i te tiatono mârô ra i te raveraahia mai o Iesu i nia i te ra'ira. E e ite atoa i te paeau anaana o te mau mea'toa, eiaha te paeau o te pouri ana'e. Eita te taata faaroo e tuu paruparu ohie i to'na ra mana'o tia, e tamau maite râ oia i te ohipa i opuahia e tae noa'tu i te oti-roa-raa.

A faaitoito hua'tu ai e tae noa'tu i te roaaraa i te mea i titauhia. E haapuraa ora to te taata faaroo i te tau ati. E metua mau ia te Atua i nia i te ra'i i te mana'oraa i te taata faaroo. Aita anei oia i mana'o mai i ta'na mau tavini i te mau tau tahito ra, i roohia mai ratou i te mau ati e rave rahi? Ua na reira mai hoi oia. Ua faaue mai oia te peropheta ra ia Elia ia haere oia i te hoê vahi moemoe, parahi ai. E ua faaue atura te Atua i te hoê manu e haere mai e faaamu ia'na. E ua na reira hoi. E ua na reira atoa hoi i to'na ra tavini ia Daniela i tuuhia oia i roto i te apoo liona. Ua tono maite Fatu ta'na melahi e na'na i opani te vaha o te mau liona. Aita ratou i rave ia'na ra, ora'tura oia. Oia'toa i ta'na na tavini tootoru o ta te arii o Nebukanesa i huri i roto i te auahi ura ra. Ua tono mai te Fatu i ta'na melahi pihaiiho ia ratou. Aita roa ratou i paapaa i taua auahi ra.

E teie nei, te ite nei tatou e, e tia roa ia tatou ia faaroo i te Atua, e ia tiaturi ia'na e na'na e horoa mai i te maitai no ô mai ia tatou nei, oia hoi te paari, te ite, te aroha, te paieti, te faaroo. E ia rahi atu â. E i te hopea ra, e noaa te mea o tei hau roa i te mau mea'toa iteahia e te taata nei.

Mai te papaihia ra e, "O te mau mea aore hi'ohia e te mata ra, aore i faaroohia e te tari'a ra, aore hoi i ò i roto i te aau o te taata ra, o ta te Atua ia, i vaiiho no te feia i hinaaro ia'na ra." "Te faaroo ia'na ra e ore oia e faahapahia, tei ore i faaroo ra ua faahapa-ê-hia na ia, oia aore i faaroo i te i'oa o te Tamaiti a te Atua ra." "E teie nei, o te faaroo e o tei haapao maite e tae noa'tu i te hopea ra, e ora ia."

—VILIAMU.

E Parau no te Miti

Eaha te tumu i parauhia'i e, e miti? Teie ia, no te mea e miti tei roto ia'na. Te faaite mai nei te feia paari o tei imi i te tumu o te mau mea hohonu o te ao nei. Te vai noa ra te miti i nia i te ao atoa nei. Ia mairi mai te ua, e ua haere noa te pape pue, ua roaa ia'na te miti no nia mai i te fenua nei, e ua tahe noa i roto i te mau anavai o te ao nei, e ua haere noa i raro i tahatai. Ei reira, oia parahi ai. Ehia tufaa o te miti i roto i te miti nei? E maha tufaa miti o tei roaa mai no roto mai i na tufaa miti hoê hanere.

Area râ, e rahi atu â te miti te noaa mai no roto i te Roto Miti (i uta i te fenua Amerika) i to roto mai i te miti o te moana nei. E piti ahuru ma toru (23) tufaa miti tei roaa no roto mai i na tufaa hoê hanere o te miti i ò atu i ò na. E mea arearea rahi ia hopu i taua miti ra, e e mea maerehia hoi e te taata'toa o tei haere i reira. E ua tau-saniraa te taata tei tae i taua miti ra i te mau tau mahanahana ia hopu. Teie te mea i maerehia e te taata, no te mea e miti avaava rahi tei taua roto ra. Aita e paremo te taata. E e mea panu noa, e no reira e mea peapea ore i te taata o tei ore ite i te au haere i taua miti ra. Ia tae atu i reira te taata mātā'u ore i te hopu i taua roto ra, te na ô maira te taata tia i ia'na, "E hoa, haapao maitai e opani roa to oe na vaha ia ore roa te miti e tae i roto. Ahiri e tae oia, e roohia oe na e te ati rahi." E oia mau â ia. E ua parauhia, mai te mea, ua iriti-atoa-hia te miti mau no roto i te miti nei, e ua tunhia'tu i nia i te ao atoa ra, e ia tapoihia te ao atoa nei ia'na, e riro te meumeu no'na hoê hanare e piti ahuru ma pae avae. E au mau hoa e, e huru rahi te miti tei roto i te moana o te ao nei.

Te Mau Melo no te Ekalesia

“E teie nei, o te tino outou no te Mesia, e e melo ana’e outou e ati noa’e.” 1 Kor. 12: 27.

I te episetole matamua a te Aposetolo ra a Paulo i to te Korinetia ra, ua faaite mai oia e, o outou, oia hoi te mau toroa’toa i taua Ekalesia ra no te Mesia ia, no te mea hoi ua faaau Paulo i te Ekalesia ra mai te huru o te tino o te taata nei.

Mai teie te huru, e ore hoi te hoê melo o te tino nei e parau mai e, “Ore noa’tu â oe ia’u nei.” E ore hoi te mata e parau i te rima e, “Ore noa’tu â oe ia’u nei,” no te mea ua haamauhia e te Atua i taua mau melo ra ei ravea ia tauturu atu i te tahi melo. E ia mauui te hoê melo, e mauui ia te mau melo atoa. Ia faateiteihia te hoê melo, e oaoa ia te mau melo atoa ra.

E oia’toa te tino no te Ekalesia. E ore hoi e tia ia parau mai te peropheta e, “E ore noa’tu te peresibutero ia’u nei,” e mai te episekopo e ore oia e tia ia parau mai e, “E ore noa’tu te Diakano ia’u nei,” no te mea ua haamauhia e te Atua te mau melo o te tino nei i te vahi ta’na hinaaro i roto i ta’na Ekalesia mai te matamua mai â.

E homa e, te faaau mai nei Paulo i teie nei parau, no te mea ua ite oia e, ua faatano maite te Atua i te haamaniraa o te tino taata nei. Ua haamau oia i te mau melo i te vahi e au i ta’na ra ohipa, ia nehenehe noa ia tauturu i te tino nei, ia faaherehere e ia paruru hoi, ia ore e pêpê i tera mea, e i tera mea. E no reira te ite nei tatou e, e mea papu te paari i te hamaniraa.

I te faaiteraa’tu Paulo i te huru no te faatupuraa o te Ekalesia, ua na ô atura oia:

“Ua tuu hoi te Atua i te aposetolo i roto i te Ekalesia, o mua ia, e te piti ra, e peropheta ia; te toru ra, e haapii ia; e te rave tapao, e te faa-ora mai, e te tauturu, e te faaite, e te parau êê.” 1 Kor. 12: 28.

E ere hoi te tino nei e melo hoê, e rave rahi râ. Na Iesu Mesia teie nei mau melo i tuu i roto i ta’na Ekalesia; ua

maiti oia i te mau Aposetolo e pîpî na'na (Mat. 10: 2-4), e i muri iho, ua ite oia e ia tae i te auhune, area râ aita e taata e rave noa'tu ei ooti, e no reira ua maiti oia i te mau hitu ahuru, e ua tonono oia ia ratou na mua ia'na i te mau vahi atoa ta'na i opua. Luk. 10. Ua haamana oia ia ratou ei tauturu atu i te mau Aposetolo no te mea e, ua rahi roa te auhune, e ua iti râ te taata ei ooti. E ua haapao Paulo i te mau peresibutero no ratou i te mau ekalesia'toa. Ohi. 14: 23. Ua haamauhia teie nei mau toroa e te Mesia, aore ratou i rave noa'e i teie nei mana i nia iho ia ratou mai te maiti-ore-hia, mai te mau orometua haavare e te mau aposetolo haavare ta Iesu i parau atu i ta'na mau Aposetolo e tae mai.

Te mau melo no te ekalesia nei, o te mau toroa ia. O ratou hoi e tiaï, e e haapao i te feia o te Ekalesia mai te au i ta Iesu i parau atu ia Petero ra, "A tiaï i tau mamoe," oia hoi, haapao ia ratou ia ore e pee atu i te mau parau faauavenave a te taata nei. Ahiri aita Iesu i hinaaro e faatamau i tana mau toroa ra i roto i ta'na Ekalesia, no te aha ua tuu oia ia ratou i roto ei tiaï e e haapao maite i te Ekalesia, e tae atu i te hopea? A hi'o na i te poheraa o Iuda Isakariota, te hoê ia o te mau Aposetolo a Iesu. Ua maiti faahou ratou ia Matatia ei mono no'na, e tapao teie ia pohe te hoê no ratou, e maiti faahou i te tahi ei mono, e ua na reira ratou e tae noa'tu i te taparahiraahia ratou atoa e te enemi.

I te mau ekalesia o te vai nei mai te Mesia mai â, o tei faaoto mai ta ratou nei pû, na ô atura, "Tei matou nei hoi, te mana e te mono mau a Iesu Mesia ra, e aita'tu." Te vai nei anei tana mau toroa ra i roto i to ratou mau ekalesia, mai ta Iesu i tuu i roto i ta'na? Aita ia. Na vai râ i parau mai ia ratou e e vaiiho, eiaha e maiti faahou? Na Iesu anei? Aita roa ia.

"Hoê â hoi o Iesu Mesia huru i nanahi, i teie nei mahana, e a muri noa'tu." Heb. 13: 8.

E no reira, aita e nehenehe ia faahuru ê i te ohipa ta'na i faatia, no te mea hoi ua parau mai o Petero e:

“I parauhia'i hoi outou; i pohe atoa hoi te Mesia iho no outou; e ua vaiiho hoi i te haapaoraa na outou, ia pee outou i to'na taahiraa avae.”
1 Pet. 2: 21.

Area râ ua faaara mai te mau Aposetolo i te nănă i te mau peropheta haavare, no te mea ua ite ratou e, e pee atu ratou i taua mau taata ra, no te mea ua a'o atu o Paulo i te mau taata'toa ma te faaea ore ma te roimata i te rui e te ao. Ohi. 20: 27-30.

E homa e, eiaha e taviriviri i ta Iesu i haapiiraa mai. Ua parau mai oia e, e tae mai te mahana e ô mai ai te lukotehae i roto i te aua mamoe e ua tae mai hoi, e ua haapurara i te nănă i na otia e maha o te fenua nei. Ua faarue ratou i te mana o te Ekalesia a Iesu Mesia e te mau toroa atoa hoi, e ua monohia mai i te tahi mau toroa i te faateiteiraa a te taata nei. E no reira, e homa, e faaroo mai na i te parau mau o te evanelia nei ta matou i hopoi mai no outou, ia ite outou i te maitai i roaa na roto mai i te mau tavini mau a to tatou Fatu, o Iesu Mesia.

“Te faaroo nei matou e, ei taata maiti-mau-hia e te Atua na roto i te tohu, e te tuuraa o te rima o te feia toroa e tia'i ia a'o i te evanelia e ia faatere i te mau ohipa no to'na ra toroa.”— SOLONA.

TE MAU MASELI NO ARABIA

Te taata ite ore o te ore i ite e e taata ite ore oia, e taata ma'ua ia. A fariu ê atu ia'na.

Te taata ite ore o tei ite e e taata ite ore oia, mea huru maitai rii oia. A haapii atu ia'na.

Te taata ite o tei ore i ite e e taata ite oia, ua pohe ia i te taoto. A faaara'tu ia'na.

Te taata ite o tei ite e e taata ite oia, e taata paari ia oia. A pee atu ia'na.

E Tere Oaoa Rahi i te Fenua Ra O Hawaii

Ua haapao te peropheta ra, o Iosepha F. Semita, e te Episekopo rahi o te Ekalesia, o Nibele to'na i'oa, e ta raua tau vahine, e te tahi atu â mau hoa, i te hoê mahana, e haere atu ai i te fenua ra o Hawaii, mataitai ai, e e farerei i te Ekalesia, e ta'na mau hoa i reira. Ua faarue ratou i San Francisco i te 20 no Febuare. Ua reva mai ratou na nia i te pahi ra o Alameda. E i to ratou tereraa'tu, ua roohia ratou i te miti rahi i na mahana e piti: ua parau mai te tahi mau taata o tei rave i te ohipa i nia iho i taua pahi ra, aore ratou i ite i te miti mai te reira te huru. Area râ, ua anaanatae noa to ratou aan i te hamani maitai mai o te mau taata ia ratou i nia i te pahi, e i nia hoi i taua fenua ra. E ono mahana i to ratou tereraa'tu i nia i te miti i tae atu ai i Hawaii i te oire ra o Honolulu.

I reira, ua farerei mai ratou i te mau taata no Hawaii o tei tairuru mai i nia i te uahu e farii mai ia Iosepha ma, ma te popou rahi. Ua tairuru atoa mai te mau taata faatairaa pû, e ua faatai mai ratou i te mau pû, mea navenave hoi e te faahi'ahi'a rahi. I muri iho, ua haere maira te peropheta i uta, e ua aroha mai ia ratou i te mau taata'toa o te tairuru mai i nia i te uahu e farerei i te peropheta, e e farii mai ia ratou atoa ma te hau e te peapea ore. I muri iho, ua aratai ratou i te peropheta i te fare amuiraa, e tae atura ratou i reira, ua faanahonaho i te mau huru maa maitatai na ratou, e na te feia faatai pû i faatupu to ratou oaoa rahi. Ua haapao ratou i te mau pureraa, e tae noa'tu i te 20 e te 21 no Mati, ua haaputuputu mai te mau taata no te amuiraa rahi i Honolulu. Ua haere atoa ratou i te tahi â fenua e mataitai e e farerei i to'na mau hoa i reira, no te mea teie te piti no to'na tereraa'tu i taua na fenua ra. I to'na apîraa, ua tonohia oia i reira e porohaere i te evanelia, no reira ua tupu ia te oaoa i te rahiraa i te fare-reiraa ia ratou ra. E no reira, ia tae atu i te mahana e ho'i atu ai ratou, ua haere mai te mau taata i nia i te uahu e ua tuu atu te mau taata i te peropheta ma te hau e te peapea ore.

Te Atua Itea Ore

I mua i te taeraa mai o te mau orometua i Tahiti nei, ua haamori te feia'toa i ò nei i te mau atua ofai. Ua hamani ratou i te mau atua, e ua tipapa ratou i mua i ta ratou iho ohipa ei haamaitai i te reira.

I te taeraa mai o te mau orometua, ua haapii ratou i te haamori i te tahi Atua ê, o tei hamani i te ao nei ma te aore, o te vai i te mau vahi atoa, e o tei parahi i te vahi aore. Ua haapii ratou e, ua opanihia te vaha o taua Atua ra i te faaiteraa mai i to'na ra mau hinaaro i te taata nei; ua pure râ ratou ia'na no ta'na haapao maitai e ta'na ra mau haamaitairaa i nia iho ia ratou.

Auê te faahuru-ê-raa o te mana'o no teie nei mau orometua e! Ua haamori teie nei feia i te Atua ma te huru mau, e e mea tia ia ratou ia ite. I teie nei râ, e haamori ratou i te Atua tino ore, o tei vai noa i te paeau varua ana'e. Ua haamana'o tatau i te fata i parauhia i roto i te Ohipa 17: 23, ma te parau i papaihia i nia iho, "NA TE ATUA ITEA ORE." E haamori ratou, e e haamaitai ratou i te tahi Atua rahi roa, aita râ ratou i ite i to'na ra huru. E pure ratou ia'na no ta'na aratairaa ia ratou i nia i te e'a ora, aita râ ratou i faaroo i ta'na reo i te faaueraa mai ia ratou ra.

Afea te mata no teie nei feia e iritihia i to ratou parahiraa i mua i te Atua mau? Afea ia ratou e haamori ai i te Atua o tei hamani i te ra'i e te ao atoa nei, e te mau mea'toa i roto ra; o tei hamani i te taata mai to'na iho huru, e o tei haere noa e paraparau i te mau peropheta i tahito ra, e o tei faaroo i ta'na mau tamarii i teie nei tau, e e horoa noa i to'na mau haamaitairaa ma te aau aroha i te feia o tei haapao maitai i ta'na ra mau ture?

Te parahi nei te mau orometua mau a te Atua i Tahiti nei i teie nei anotau. Ua faatia te Atua i ta'na Ekalesia i roto i te ao nei i teie nei mau mahana hopea, e ua tonomaira i ta'na ra mau orometua e afai mai i ta'na evanelia, e e

faatia i ta'na basileia i nia i te fenua nei. Te hinaaro nei te Atua i te taata taatoa ia ite ia'na, e ia haamori ia'na ma te aau haehaa e te pure mau. Te hinaaro nei oia ia haapii i ta'na mau tamarii, e ia aratai ia ratou i roto i to'na ra basileia i roto i te ra'i. Ua faaite atura oia i ta'na mau ture i ta'na mau tavini, oia hoi te mau peropheta, e ua faaue atura oia ia ratou e a'ohaere i te tatarahapa e te baptizoraa i te mau nunaa'toa o te ao nei.

E teie nei, afea e haamorihia'i te Atua e tatou atoa nei? E fariu tatou ia'na, e e haamori ia'na ma te aau haehaa. E farii tatou atoa i ta'na parau na roto mai i ta'na mau peropheta i te mau mahana hopea nei, e e faarue i ta tatou mau ohipa iino, e to tatou mau Atua êê, e e haamori â i te Atua mau, ia tia ia tatou i parahi i mua i to'na ra aro e noaa i te ora mure ore.— HENERE.

Te Mau Ui Mana'o

- U. Eaha te mea e roaa mai na roto i te puhipuhiraa i te avaava?
- P. Te utu ereere, aho hau'a ino, e te feruriraa paruparu.
- U. Eaha te mea e roaa mai na roto i te inuraa ava?
- P. Mana'o maamaa, e te vêvê.
- U. Eaha te mea e roaa mai na roto i te haavare?
- P. Te roo ino, e te hinaaro-ore-hia e te taata nei.
- U. Eaha te mea e roaa mai na roto i te eiâ?
- P. Te haamâ rahi, te rima tapea, e te parahiraa i te fare auri.
- U. Eaha te mea e roaa mai na roto i te taiata?
- P. Te peapea hnru rau, te tino paruparu, e te parahiraa ore i te basileia o te Atua ra i te ao a muri atu.

E au mau hoa e, eiaha e rave teie nei mau mea i faaitehia i nia nei. Te na ô mai te parau a te Fatu:

“E tâhitohito tei te uaina; e hauti rahi tei te ava taero; e ere i te taata paari tei vare i te reira.” Mas. 20: 1.

“E ere te avaava i to te tino, e ere atoa hoi i te mea maitai na te taata, ei raau rii râ no te mau pêpê, e no te puaatoro pohe ma'i hoi, ia au râ te raveraahia mai i te ite e te paari.” B. F. 89: 7-8. B. F. S. 86: 1.

Te Mau Parau Api.

Na roto i te ati pohe o te hoê puahi'ohi'o o tei tupu i te pae apatoa i te hau Amerika, ua pohe roa na taata e 174, e e rave rahi te mau tao'a mai te fare, te raau, e te faaapu i pau ia'na.

I te 24 no Eperera, ua aueue te fenua o tei parauhia Porutugala i Europa. E no te puai rahi o te aueueraa, ua mairi te mau fare e rave rahi i raro, i te oire Benavena. Pohe roa'tura na taata e 55. Ua piri te rima, te avae, e te tahi atu â mau melo o te tino. Aita e ravea ta ratou. I muri a'e i te reira, ua ama te mau fare e rave rahi, e ua pau i te auahi.

I te avae Eperera nei, ua tupu te hamani ino e te taparahiraa taata i te feia Kerisitiano i te paeau fenua i parauhia o Asia Iti. Ua riri maira te haapaoraa Mahometa i taua feia Kerisetiano, e ua taparahi pohe roa e pae tausani taata. E e rave rahi te mau tino taata o tei pêpê. E ua taparahi pohe roa i te mau orometua Porosetani 19. E mea riaria rahi hoi ia taio i teie nei parau apî.

I te oire San Francisco, ua ama te hoê fare rahi tipaeraa i te auahi. Tei te po te amaraa. E toru hanere taata tei taoto i roto i taua fare ra. No te oioi o te paura, aita e ravea e pou ai te mau taata i raro. No reira, ua ou'a noa ratou i raro na roto mai i te mau haamaramarama o taua fare ra. Ua mairi noa ratou i nia i te e'a haapaarihia ei haereraa no te taata. E no reira, ua fati te rima e te avae, e ua pêpê hoi te tino o te rahiraa o te mau taata i mairi mai e ua pohe roa e pae ahuru taata o tei ore i ou'a i raro. Pau ihora taua fare ra.

I te mahana 28 no Eperera, ua tupu te hoê peapea rahi i te fenua o Turuki. Teie te tumu, e orure hau. Te ui taata apî o taua hau ra. Aita ratou i hinaaro i taua tavana ra. Ua pari ratou ia'na, na ô atura, "Aore oe i haapao maitai i te mau ture tumu o te hau nei. E ua haamâua-noa-hia te moni a te hau ia oe na. Ua hamani-ino-hia te mau taata e rave rahi i roto i teie nei hau, aita roa'tu i faaorehia e oe te reira," E i muri a'e, ua haaputu mai ratou i te hoê nuu rahi, tama'i atura ratou i te tavana e to'na mau taata. Ua vî te tavana e to'na mau taata ia ratou. E ua mau ratou ia'na e ta'na atoa utuafare, e ua tuu ratou ia'na e to'na atoa ra i nia iho i na pereoo auahi e piti. Faahoro atura i te vahi atea i te hoê oire ê, ei reira i parahi ai. E i muri a'e, ua faatavanahia te hoê ta te mau orure hau i hinaaao, oia hoi o tei parauhia e, Mahometa Pae. I muri a'e i to'na faatoroaraahia ei tavana, ua haapaohia te hoê pureraa no'na, e teie te tahi ohipa i ravehia e ratou i reira, oia hoi ua faatusia ratou i na mamoe e ono, ei faaturaraa'tu i te tavana apî. Mauruuru a'era ratou atoa i te na ôraa mai e, "Teie nei, te î nei matou i te oaoa."

I te mahana 27 no Eperera, ua rave te taata i te fenua Itali i te ohipa faaî i te mau farii vairaa mori arahu i roto i te pahi tama'i. E inaha, ua ama te mori, paapaa ihora te mau taata e rave rahi, e ua pohe roa na taata e hitu. E muri iti a'era, ua tuu ratou ia'na i raro i te tai, tapoihia ihora, moe roa'tura.

I te fenua i parauhia Papua, i te mahana 24 no Eperera, ua tupu te hoê vero rahi. E ua mairi mai te ûa puai rahi, faaito ore. E no te mata'i rahi, ua hurihia na fare pureraa 21 i raro. Ua parari te tahi pae, e ua pau hoi te tahi pae. Ua hurihia na taata tootoru i te miti, pohe roa'tura ratou. Te tao'a e pau i taua vero nei, oia hoi e 80,000 dara.

Teie te rahiraa o te mau Haapiiraa Sabati i roto i te Ekalesia a Iesu Mesia i te Feia Mo'a i te Mau Mahana Hopea Nei, 1,164. Ua haapaohia na Haapiiraa Sabati 51,526 i te matahiti i mairi a'e nei. Teie te rahi o te mau orometua haapii, 1,996. Teie te rahi o te mau i'oa i papaihia i roto i te mau buka Haapiiraa Sabati, 163,738. Ua papaihia na i'oa apî i te matahiti i mairi a'e nei, 10,000, e te tupu noa nei â i te rahiraa.

I te oire o Nu Ati, i te pae i te hitia o te râ i te fenua Amerika, ua parahi te taata e rave rahi i roto i te hoê fare rahi i tarahuhia e ratou. E te noho noa ra i taua oire nei, te hoê pûpû taata o tei parauhia taata patoi hau, faaore ture fenua, e e taparahi taata hoi. Ua papai atu teie nei pûpû taata ino i te hoê reta i te feia parahi i taua fare ra, na ô atura, "E aufau mai ia matou nei 1,000 dara. E aita râ, e roohia mai outou i te pohe." Aita taua mau taata e aufau mai i te moni ia ratou. Inaha, i te tuiraa po, ua haere atura taua pûpû taata ino ra, e tutui i taua fare ra i te auahi, pau ihora; te taata i roto i taua fare ra, paapaa ihora te tahe pae. Pohe ihora na taata toovau no ratou.

Tei te fenua ra o Aferika, te hoê taata i te parahiraa. E taata tao'a rahi hoi oia, e e rave rahi te mau tavini tarahu na'na ra. E te rave noa ra te hoê tavini no'na i te ohipa i ô i te faaapu ra, inaha hi'o atura oia i te hoê ophi rahi te taoto noa ra. Te i'o o taua ophi ra e maa hiaai rahi e taua mau taata ra. Ei reira aita oia e haapeapea noa mai i taua ophi ra. Te na ô maira oia i te parauraa ia'na ihora, "Ia po râ, e ho'i mai ai au e tairi ia oe i te raau, e ia pohe oe ia'u." E ia huru po te mahana ra, ua ho'i faahou mai taua taata ra e tairi i taua ophi nei i te raau. Inaha, ua araara a'era-oia, ou'a maira i nia ia'na, mai te puai rahi i te taviriviraa, e ua ofati noa i te mau ivi o to'na ra tino, e ua pohe ihora oia. Horomiihia ihora e taua ophi ra.

Toae a Maire, Faaau Parau,

Rue Dumont d'Urville, Orovini, Papeete, Tahiti.

W. A. Seegmiller, Imprimeur,

Rue Bréa et de la rue Dumont d'Urville, Papeete, Tahiti.